

Colegio San Agustin lo duna les den edificio “afgekeurd”

ORANJESTAD – Scol no a cuminsa ainda pa alumnonan di Colegio San Agustin. Esaki lo cuminsa dia 20 di augustus ora cu Task Force cu ta cay bou Departamento di Obra Publico (Dow) caba cu nan trabou. E lesnan lo wordo duna na edificio di Prinses Christina school cu ta un edificio afgekeurd.

Esaki Maribel Lampe, director di Colegio San Agustin a bisa.

E scol Colegio San Agustin ta un edificio afgekeurd y mes-ter bay den proceso di renobacion esaki e scol a wordo priminti, segun sra Lampe. Pa e trabounan aki inicia e scol mester a sali y bay den un otro edificio afgekeurd cual ta esun di Prinses Christina school.

Mirando cu ta mudando den e dlanan aki y ainda falta hopi cos pa bay na nan luga a dicidi di pone e fecha cu scol ta cuminsa dia 20 di augustus. Falta borchinan pa wordo poni y klas di computer mes-

ter wordo drecha y sigura, pa menciona algun di e cosnan cu falta, sra. Lampe a bisa. A puntra sra. Lampe si e detayenan aki lo keda cla sigur pa dia 20. El a bisa cu tin speranza cu nan ta keda cla pa e dia ey. “E parti di mudamento a bay hopi lihe pero e parti di Task Force ta locual tin e proceso pega”.

Task Force

Durante e vakantie di juli tabata spera cu e trabounan aki lo a wordo ehecuta pero esaki no a sosode manera e tabata plania p’esey e trabou a tranca, sra. Lampe a duna di conoce. Den e periodo aki a purba tuma contacto cu Task Force, e problema a sinta como cu Task Force ya no ta cay bou di Ministerio di Enseñansa mas sino bou di Dow. Pues no por a haya ningun persona te cu dia 13 di augustus cual tabata un dia prome cu scol cuminsa, sra. Lampe a splica.

“Den caso cu no tende nada lo mester pospone e fecha cu scol ta cuminsa”. Skoa lo percura pa publica esaki si esey ta e caso.



Plan pa renobacion

“Nos a sinta cu Dow y Departamento di Enseñansa, Colegio San Agustin ta poni riba plan pa wordo renoba, e scol mester di esaki paso nunca el a haya un bon renobacion ya pa mas di 50 aña”, sra. Lampe a bisa.

Como cu nada no a wordo renoba, e ora ey nan a plania pa e scol sali for di e edificio ey y bay den e edificio di Prinses Christina school. “A

wordo priminti cu esaki lo tuma 8 luna, mirando e situacion na Aruba nos sa cu mes-ter haci nos mes mas comodo posibel na Prinses Christina school pa e renobacion por tuma luga, mas largo nos keda den e scol mas e plan ta wordo posponi, sra. Lampe a splica.

Edificio mal estado

E edificio di Prinses Christina school tampoco ta un edificio ideal, e ta un edificio

afgekeurd.

El a wordo drecha un poco aki aya pa mehora su estado pero e ta keda un scol cu ta afgekeurd. Bon Dia Aruba a puntra sra. Lampe pa splica un poco kico e kiermen cu afgekeurd. El a bisa cu e murayanan ta pinta, esey no ta e problema.

Pero tin problema cu blafon, no tin watercooler ainda pa e muchanan, no por pone airco pa motibo cu e capacidad di coriente na e edificio no ta carga airco kiermen lo ta hopi calor pa e muchanan. Pesar di esaki e scol no tin borchin tampoco y e aña escolar aki e scol tin mas o menos 270 alumno cu klasnan di 30 alumno.

Un otro problema, cu no solamente Colegio San Agustin, tin ta e hecho cu no tin suficiente banki pa e cantidad di muchanan, segun e director. Departamento di Enseñansa tampoco por yuda e scol cu esaki mirando cu e ta un problema di mas scol, sra. Lampe a finalisa. □